

太平經鈔甲部卷之一

太平金闕帝晨後聖帝君師輔歷紀歲次平氣去來兆候賢聖功行  
種民定法本起

問曰 三統轉輪 有去有來 民必有主 姓字可得知乎 善哉  
子何為復問此乎 明師難遭 良時易過 不勝喁喁 願欲請聞  
愚闇冒昧 過厚懼深 噫 非過也 天使子問 以開後人 今悟者  
識正 去偽得真 吾欲不言 恐天悒悒 亂不時平 行安坐 當為  
子道之 自當了然 無有疑也 昔之天地 與今天地 有始有終  
同無異矣 初善後惡 中間興衰 一成一敗 陽九百六 六九乃周  
周則大壞 天地混齏 人物糜潰 唯積善者免之 長為種民 種  
民智識 尚有差降 未同泐一 猶須師君 君聖師明 教化不死  
積鍊成聖 故號種民 種民聖賢 長生之類也 長生大主 號太平  
真正太一妙氣皇天上清金闕後聖九玄帝君 姓李 是高上太之胄  
玉皇虛無之胤 玄元帝君時太皇十五年太歲丙子兆氣 皇平元年甲  
申成形 上和七年庚寅九月三日甲子卯時 刑德相制直合之辰 育  
於北玄玉國天岡靈境人鳥閣蓬萊山中李谷之間 有上玄虛生之母九

太平經鈔甲部 卷一

清微藏書閣

玄之房 處在谷陰玄虛 母之始孕 夢玄雲日月纏其形 六氣之電  
動其神 乃冥感陽道 遂懷胎真人 既誕之旦 有三日出東方 既  
育之後 有九龍吐神水 故因靈谷而氏族 用曜景為名字 厥年三  
歲 體道凝真 言成金華 五歲 常仰日欣初 對月歎終 上觀陽  
氣之煥赫 下睹陰道以虧殘 於是歛魂和魄 守胎寶神 錄精填血  
固液凝筋 七歲 乃學吞光服霞 咀嚼日根 行年二七 而有金  
姿玉顏 棄俗離情 擁化救世 精感太素 受教三元 習以三洞  
業以九方 三七之歲 以孤棲挫銳 四七之歲 以伉會和光 五七  
之歲 流布玄津 功德遐暢 六七之歲 受書為後聖帝君 與前天  
得道為帝君者 同無異也 受記在今 故號後聖 前聖後聖 其道  
一焉 上昇上清之殿 中遊太極之宮 下治十方之天 封掌億萬兆  
庶 鑒察諸天河海 地源山林 無不仰從 總領九重十疊 故號九  
玄也 七十之歲 定無極之壽 適隱顯之宜 刪不死之術 撰長生  
之方 寶經符圖 三古妙法 秘之玉函 侍以神吏 傳受有科 行  
藏有候 垂謨立典 施之種民 不能行者 非種民也 今天地開闢  
淳風稍遠 皇平氣隱 災厲橫流 上皇之後 三五以來 兵疫水

火更互競興 皆由億兆心邪形偽 破壞五德 爭任六情 肆兇逞  
暴更相侵凌 尊畢長少 貴賤亂離 致二儀失序 七曜違經 三  
才變異 妖訛紛綸 神鬼交傷 人物凋喪 眚禍荐至 不悟不悛  
萬毒恣行 不可勝數 大惡有四 兵病水火 陽九一周 陰孤盛則  
水溢 百六一匝 陽偏興則火起 自堯以前 不復須述 從唐以後  
今略陳之 宜諦憶識 急營防避 堯水之後 湯火為災 此後遍  
地小小水火 罪重隨招 非大陽九 大百六也 大九六中 必有大  
小甲申 甲申為期 鬼對人也 災有重輕 罪福厚薄 年地既異  
推移不同 中人之中 依期自至 中之上下 可上可下 上下進退  
升降無定 為惡則促 為善則延 未能精進 不能得道 正可申  
期 隨功多少 是以百六陽九 或先或後 常數大曆 准擬淺深  
計唐時丁亥後 又四十有六 前後中間甲申之歲 是小甲申 兵病  
及火 更互為災 未大水也 小水遍衝 年地稍甚 又五十五丁亥  
前後中間 有甲申之年 是大甲申 三災俱行 又大水蕩之也  
凡大小甲申之至也 除凶民 度善人 善人為種民 凶民為混齋  
未至少時 眾妖縱橫互起 疫毒衝其上 兵火繞其下 洪水出無定

## 太平經鈔甲部 卷一

清微藏書閣

方 凶惡以次沉沒 此時十五年中 遠至三十年內 歲災劇 賢聖  
隱淪 大道神人更遣真仙上士出經行化 委曲導之 勸上勵下 從  
者為種民 不從者沉沒 沉沒成混齋 凶惡皆蕩盡 種民上善 十  
分餘一 中下善者 天滅半餘 餘半滋長日興 須聖君明師大臣  
於是降現 小甲申之後 壬申之前 小甲申之君聖賢 嚴明仁慈無  
害理亂 延年長壽 精學可得神仙 不能深學太平之經 不能久行  
太平之事 太平少時 姓名不可定也 行之司命注青錄 不可司錄  
記黑文 黑文者死 青錄者生 生死名簿 在天明堂 天道無親  
唯善是與 善者修行太平 成太平也 成小太平 與大太平君合德  
大太平君定姓名者 李君也 以壬辰之年三月六日 顯然出世  
乘三素景輿 從飛輶萬龍 舉善者為種民 學者為仙官 設科立典  
獎善杜惡 防遏罪根 督進福業之人 不怠而精進 得成神真  
與帝合德 懈退陷惡 惡相日籍 充後齋混也 至士高士 智慧明  
達 了然無疑 勤加精進 存習帝訓 憶識大神君之輔相 皆無敢  
忘 聖君明輔靈官 祐人自得不死 永為種民 升為仙真之官 遂  
登後聖之位矣

後聖李君太師 姓彭 君學道在李君前 位為太微左真 人皇  
時 保皇道君並常命封授兆民 為李君太師 治在太微北塘宮靈上  
光臺 二千五百年轉易名字 展轉太虛 周旋八冥 上至無上 下  
至無下 真官希有得見其光顏者矣

後聖李君上相方諸宮青童君 後聖李君上保太丹宮南極元君 後聖  
李君上傅白山宮太素真君 後聖李君上宰西城宮總真王君

右五人 一師四輔 輔者 父也 扶也 尊之如父 持之得行  
總號為輔 分而別之 左輔右弼 前疑後承 承者 發言舉事  
拾遺充足 制斷宣揚 即是宰也 疑者 向思未得 啟發成明 即  
是傅也 弼者 必定猶豫 即是保也 扶君順師 周匝入道 即是  
相也 四五占候 俱詳可否 贊弘正化 總曰輔師 閑居之時 前  
向有疑問之傅 後顧慮遺問之承 右有所昧問之弼 左有未明問之  
輔 諮詢四輔 相保傅宰 成功在師 不可闕也 聖帝垂範 使後  
遵行 入有保 保用事也 陰屬右 靜寶真也 出有師 師用事也  
陽屬左 動歸寂也 至此最難 故略輔相而言師也 望有傅 傅  
在前 敷說議趣也 顧有宰 宰在後 決斷是非也 其餘公卿有司

## 太平經鈔甲部 卷一

清微藏書閣

仙真聖品 大夫官等三百六十一 從屬三萬六千人 部領三十六  
萬人 民則十百千萬億倍也 常使二十四真人密教有心之子 皆隸  
方諸上相 不可具說 但諦存其大 自究其小也 善哉 今日問疑  
更聞命矣

問曰 李君何所常行 而得此高真 太師四輔學業可聞乎 善  
哉 子為愚者 迷不信道 學不堅固 進退失常 墮卑賤苦 故勤  
勤問之乎 今為子說之 夫無始中來 積行久久 一善一惡 不可  
具言 言之無益 今取近所行 得成高貴者 靈書紫文為要 東華  
玉保高晨師青童大君 大君清齋寒靈丹殿黃房之內 三年上詣上清  
金闕 金闕有四天帝 太平道君處其左右 居太空瓊臺洞真之殿  
平玉之房金華之內 侍女眾真五萬人 毒龍電虎 獲天之狩 羅毒  
作態 備門抱關 巨蚪千尋 衛於墻岸 飛龍奔雀 溟鵬異鳥 叩  
啄奮爪 陳于廣庭 天威煥赫 流光八朗 風鼓玄旌 回舞旒蓋  
玉樹激音 琳枝自籟 眾吹靈歌 鳳鳴玄泰 神妃合唱 麟僂鸞邁  
天鈞八響 九和百會 青童匍匐而前 請受靈書紫文 口口傳訣  
在經者二十有四 一者真記諦 冥諳憶 二者仙忌詳 存無忘

三者探飛根 吞日精 四者服開明靈符 五者服月華 六者服陰生符 七者拘三魂 八者制七魄 九者佩皇象符 十者服華丹 十一者服黃水 十二者服迴水 十三者食環剛 十四者食鳳腦 十五者食松梨 十六者食李棗 十七者服水湯 十八者鎮白銀紫金 十九者服雲腴 二十者作白銀紫金 二十一者作鎮 二十二者食竹筍 二十三者食鴻脯 二十四者佩五神符 備此二十四 變化無窮 超凌三界之外 遊浪六合之中 災害不能傷 魔邪不敢難 皆自降伏 位極道宗 恩流一切 幽顯荷賴 不信不從 不知不見 自是任聞 永與道乖 塗炭凶毒 煩惱混齏 大慈悲念 不可奈何 哀哉 有志之士 早計早計 無負今言 曰 善哉善哉 今日問疑 更聞命矣

太平經鈔甲部卷之一竟

天運壬辰年巳月正一天師清微弟子洪鼎堅羅大英恭錄彙編

張亞靜複校

太平經鈔甲部 卷一

清微藏書閣